

L.B.

I-1



BIBLIOTECA CIVICA
UDINE

Misc.

SFF

101.

12

SOCIETÀ FILOLOGICA FRIULANA

"G. I. ASCOLI,"

UDINE

BIBLIOTECA

N. 408345

101, 12

[Aut. Broili]

IL FURLAN IN PARNAS

*Cul so viaz d' Arte
Sporchie la chiarte
Sperand dai Udines
Accogliment cortes
E dal Popul chiar di Plan
Generose buine man.*

*Done Cesar Mendon
25/IX/22*



UDIN
STAMPARIE VESCOVIL
1843.



AVIS AL PUBLIC

SUNETT

CHE SERV DI PREFAZION

Il Furlan in Parnas dut sbarlufit
Al zire pe Citat a plui podè,
Cul Cośmorame in man, par fa vedè
Lis maraveis di Plan tant riverit.

In tre appartamens distribuit,
Stanzis nonantenuv abraçe in sè
Di gnuv coni adobadis a plasè,
Di quatri piartiis l'une a undecim pit.

Da Udin us cundus infin ad Arte
Segnand ad un ad un ju incors país,
E po us bute a la Font a brene viarte.

De Pudie lis virtus ai vers Amis
Dispense a plene man e in buine chiarte,
Sicur di gioldi il frutt des sos sadis.

IL VIAZ ALL'AGHE PUDIE IN CHIARGNE
CUN DOMICILI AD ARTE

CANZON.

CHIANT I.

Udin lasci dizun de me' persone
E non si vise di essi in vedovat;
Prei d'un punchio Chiavris e al mi minchione,
Passi Padiar, e nol mi dis un flat.

Tresesim viod cun estro indifferent,
Filtri Quelalt, e mi sberdei d'Artigne,
Branchi Glemone par un sol moment,
Parcè che hai cognossut che je une ghigne.

Imbochi Ospedalett, bussi Ospedal,
Venzon saludi, e Puartis riveriss;
Sguazi sul puint de Fele il biel canal,
E ad Amar inoltrat passi di sbriss.

Ju fosc orors susurregians rujuss
Lasci di voli, e schiampi vie drett;
Rivi a Tulmiezz, alogi da Chianduss
Che mi ha tratat benon di taule e jett.

Jevi di miarcuzz chiol un bon caffè,
Monti in Carete, e Chiase Gnove sdegni;
Tiarz, Formajas, rimarchi lì ch' a l'è,
E cun stentis a Zui rivà m'inzegni.

Da lì passai a sostignì mil schiass
 Sdrondenand convulsiv e tremebond
 Afrontand aghis, brancoland pai class
 Fin quasi ad Arte del biell plan giocond.

Rivat a l' a fin stracc in chel pais,
 Sbocchi in Locande in sen de Cividine,
 In braz d' un gropp di nazonâi Amis,
 Che bussà no podei par che matine.

Sunat po lu misdì, in t' un moment
 Saltarin fur cà e là da ogni chianton:
 E giuliv abbrazzaz, plui che content,
 Passai cun lor a laute refezion.

Dopo coruz in tropp e Vasche pudie,
 Vin dug a prove insieme tracanàt
 Di che aghe; che quant plui si osserve e studie,
 Tan mancul si cognoss la so bontat.

Limpide in sen de furibonde But
 Sgorghe gloriose in quatri ponz vicins
 Di muart aportatrice, o di salut,
 Ministre fide dei segnaz Destins.

Cabbie la mostre sul spuntà del dì;
 In Lui da Fielis squet l' oscur ponent;
 Dal Marian isolat spiete il misdì;
 Nè tramontan da Sciai sdegne furent.

Marche il placid so cors d'un biell cored
 Ch' in blanc scomenze, e va finind in zal,
 Simil al zolfarin, cui no la ced
 L'acut odor, se Sirio è liberal.

Je simpri abonde d'un Maestral Siropp
 Di ploe compost e us fraiz tra i savolons,
 Che qual arint brunìt filtre a galopp,
 E fas imbrividì fin ju telons.

Tre tazzis a dizùn e tre la sere,
 Se no us passin a trott come un spinell
 Dentri pos dis, us prei, voltait bandiere
 Se no lassais, in brev, parbio la piell.

Ma cò sperimentais un bon efiett,
 Bevit e tracanait a plui podè;
 Che in quindis dis purgaz la smilze e il pett
 A chiasse corares come un Lachè.

Se di Venose il rinomat Cantor
 Ves cognossude cheste amabil Font,
 Lis sos gloris vares in biell tenor
 Spandudis dall'orient fin al tramont.

Cussì da dug cumò ben cognossude
 A miars i plovaressin a riduess
 Ju oltremontans stranirs, pe' cui vignude,
 Chel biel plan in Citat si cambiaress.

Tant puars e richs, Chialunis e Plevans,
 Regios Soggezz, Artisg e Laureaz,
 Zovins e Vechios, Malatiz e Sans,
 Ogn' an l'onorin par doi mes filaz .

Grass e magris, barbos, gobos e drezz,
 Maschis a sguaz, di rango clar e oscur,
 Umin e fruzz, par genio opur costrezz,
 Là, tre voltis in di plombin sicur.

Je, custodide da dos altris Fonz
 Zimulis chiaris d'ossid ross di fiar,
 Dei Flocs vestide des vicinis Monz
 Turgide olezze senze elett ripar.

Biell vedè a clups graziosis Zovenetis
 Curvai l'ilare front umils, devotis;
 E je pietoze offrii stillis diletis,
 Ch' in tribut ripartit sgravin a botis.

Contempland doi Frutins jo o crod zermans
 Te Font spiegiasi, e di' ba-bà ba-bà,
 E bevi e gioldi e sbati anchie lis mans,
 Crodevi di dolcezze al sclopà.

Une rustiche banchie a tre pecoi
 Par merit del Dotor Sior Cragnulin,
 I stà a la gestre; e intor plui class pandoi,
 Siele ofrissin gratuite a ogni martin.

Misurand cu la panze la tignude,
 Là a plui podè si bev in piis, sintaz;
 Si converse moland qualchi ridude
 Che eletrize ju sans e magagnaz.

Si travase po he hei! a gorne plene
 Senza timor di scrideli i polmons;
 Ch' anzi passand pluitost si purghin; e serene
 Torne l' urne tra bref dei maranzons.

Nel fresc so umor si lavin lis personis,
 Si fas bagnos a fred, tepiz e chialz
 Che fasin pià sudadis brutononis
 Da cui filtre salut quasi di sbalz.

La front incoronadè da Avosas,
 I dà ad Arte la drete da vicin,
 E po la zanche, a Plan cui bràs tiraz
 Plan chiar, del bipartit florid confin.

Spojadis quasi affatt lis spiziariis,
 E trituraz ju Miedis plui famòs,
 Da je vait, o consunz nes malatüis,
 Se olès viodi prodigios strepitòs.

Qual Roatiche famose medisine,
 Stampand in fazze i primitivs colors,
 Cùn rilass purgativs e pronte urine,
 Da chiaf a piis us viest di gnuvs vigors.

Non baste minghe sol stà sot lis cotulis
 Par squedi i fiis da che zintil Matrone?
 Bisugne mangià ben, e contà frotulis,
 Svoland par ches culinis in majone.

Bisugne butà a mont ogni passion,
 E vivi regolaz e in alegrie,
 Lassà ju intrics di chiasse in abandon,
 E ridi a crepepance in compagne:

Tal aghe è un sempliz spron, un incentiv;
 Il rest po un salutar secret rimiedi,
 Che insieme uniz si forme un lenitiv,
 Par fa murì di fan Spiziar e Miedi.

CHIANT II.

Par schiazzà fur che gnagnare ch' o vevi,
 Za lu saves, che ad Arte soi rivat,
 A sconzurà chei miezz, ch' usà si devi.
 Da un avilit puar diaul e strusciat.

Il Dotor Butazzon cu la Famee;
 Il Cumissari Brun cu la so Spose:
 Rizzane Anute di leggiadrè idee,
 Margarite za Mari aletuose:

Preoseff Bonan, delizie social:

Ju doi Preantonis Jesse e Vinturin:

Chell ch' ognidì di sbalz a no' giuvial

Decrez slanzave, e a l'è sior Cragnulin.

Senze chei menzionaus là di Talott,

O pe Vile spanduz, o in Avosas,

Ne chei di Plan disore, o Plan disott

Par no faus po restà cun tant di nas:

Jere che la me dolce compagne,

Che raccolte in Locande dei Jacozz,

Parave ogni tristezze in agonie

Senze bisugne di strazà decozz.

No vevin presi i titui o richiezzis,

Non viltat un' ignobil condizion;

Non riserve lis miors o pies fatezzis,

Che co s' uniss lis pars, l'è un sol bocon.

Si gioldeve e mangiave in societât

Scoland, ridind, poetand a barbe grochie,

Cun muse franchie, e plene libertat,

Senze pore di critiche starlochie.

E saltuzant par riui, par sterps par crezz,

Si zirave pes vilis plui rimotis,

Si zujave di sbogh o siett e miezz,

Si chiantave in Furlan bielis vilotis.

A viodi ches bielissimis Chiargnelis
 Sparnizadis cà e là par boscs, par plans,
 Mi leve, us zuri, il' cur in zanzarelis,
 Co slanzavin ju acuz oltre i soprans.

Se levin di rivoch po a la sorgent,
 S'ingropavin cun altris compagniis,
 E senze complimenz, in t'un moment,
 Par tant cu dure si ere dug amis.

E ognun po li contave barzelettis
 Di fa lassà lis questis in te grave,
 E al si tornave in daur plui che Poetis,
 Chiantand di ches di Berte co filave.

Permess, Castali, Iliss e l' Aganipp
 In fазze a cheste Font son basoai
 Parcè che del so fluid bivut un sclipp,
 Nus ha rindus sul fat quasi imortai.

Eh! ches rimis potens che fulminavin,
 Chei viars improvisaz a sanfassò;
 Chei estros mazz, che il cur eletrizavin,
 Fasevin montà i crozz sul mi-re-dò.

Co si schersave in taule a plene orchestre,
 Saltavin ju bozzons come zupezz,
 Schiampave il less sparive la mignestre,
 Svolavin vie dal platt frizz e polezz.

Stanc, stuff di robà puinz Deucalion,
 Di là in quadrighe Febo intabarat,
 Eolo di fa tai boscs di zafaron,
 E Giove di trai folcs come un spirtat:

Eco pronz ju folz nui a bati il tach,
 E a serenassi il Cil in pos minuz,
 La blave alzà la creste e fa il penac,
 Florì la jarbe, e torreggià i paluz:

La falz zirà di gnùv ogni setor,
 Tornà a passon la vigil Pastorele,
 Cori in ronde cul sclop il Chiazador,
 E il sec forment raquei par la taviele:

Strenzi l'urne ogni flum, e sbassà i quars,
 Rivestissi ogni bosch di vivs colors,
 Ralegrassi il Menaüs e ju Zatars,
 E sciolzi ju uceluzz novei tenors.

Viodind che ere al mio ariv dutt preparat,
 Ed Arte za cambiade in biell Permess,
 Sior Eride che mostre d'empietat,
 Fra no si chiazze par chiatà petess.

E dat di man e banchie de Fontane
 Quant che jerin sogezz distinz sentaz,
 Par daür vie cun man empie profane
 Ju ha sul fatt istess dug ribaltaz.

Violdind che l'han butade cheste in ridi,
 Slanze quintrì di me ju ardiz sgrifons;
 E mentri da la Font ripett sussidi,
 Mi sburte ju cun frusto dai bragons.

Benchè mi vess scussat anchie un zenoli,
 Jo l'hai puartade istess da cortesan;
 E senze viarzi il becc siarai un voli,
 Par no fami tratà da Barbezuan.

Non contente anchiemò che brute e fur,
 Sciarat t'un prest Favoni in tal carnir,
 Mole Garbin passut del glazz plui dur
 Par ch' al fasi cun treno il so mistir.

Ma no, che vin scuviart la baronade,
 Si vin armaz di viestis e tabar;
 E dat un pesto chian in camarade,
 Lu vin lassat miezz muart su d'un ripar.

Alore sbarlufide e tremebond,
 Va su la Mont des Striis e dai Strions;
 E là fricand, vaind, e gemebond
 Seonzure i Dios d'abiss plui buzzarons.

Moss a pietat de lor comun Regine
 Clamat ju Magos vechios a Chiapitul,
 Protestin di puartà guast e rovine,
 E di non ve pietat par nissun titul.

E là Spandind la nèv glazzure, e scur;
 E cà la ploe cun fulmins, tons, saetis,
 Po tempieste fatal cun gran sussur,
 E vinz e lamps molaz per istafetis:

Alore sì che nus vignì pardie
 Un general tremor da chiaf a pis;
 Per cui han dicidut di schiampà vie
 Al prin incontro, ju plui chiars Amis.

Quand' ecco malapene ve' gustat,
 Soste cà e là il burlaz, ferme la buere:
 E lor qual' Ors ferit e spaventat
 Schiampin dug come il folc de me riviere,

Mi lascin quasi sol come un jubal,
 E cu la pive in sacc e blecc fricant,
 Zirant ju voi d'intor come un cocàl
 Avilit, desolat, ma pur costant.

CHIANT III.

Subit che jo vedei Zotti Pre Antoni,
 Antivar, là Ragoze ed Ugonè;
 La Copie Zintil Cente e Marangoni
 Vignì d'alogo in te Locande me:

Jò, sul moment, tornai da muart a vite,
 E al pletro miò da poc abandonat,
 Crodind che ogni boraschie fos dislite,
 E di passà un biell piezz in societat.

Ma oh Dio! che apene nus siet dis passaz
 Zirin d'intor mil altris nuvolons
 Cun ploe tremende, e vinz infuriaz
 Ch'emplin la But, e slavin ju lis Monz.

Cu la fufe t'al cul, cambiade scene,
 Tachi sott ju chiavai dai Capucins,
 E il cont pajat, chiolt su il fagott in schene,
 Me mochi vie cul len dai pilgrins.

Di premure no dant nanchie un salut
 Ai chiars Amis, benchè ju ves in cur,
 Sguazzi precipitos ju brancs de But
 In sul spuntà del dì fra lus e scur.

Rivat a Zui, saludi il Monsignor;
 Di Formias a Tulumiezz sbrissi in carete,
 E tornat da Chianduss, vei lu dolor,
 Di non jessi contat une gazete.

Jò in ulore sdegnand chell Camarir
 Che tars pratind plui premi dal Paron
 Benchè ves muse il timp di canonir,
 Lu saludai moland un cospeton.

E avodat al mio incontro primitiv,
 Cun t'un muzul a Amar, un a Ospedal,
 A Glemone rivat plui muart che viv,
 Mi hai sul stomi tirat plui d'un bocai.

Jo vei po lì, sal zuri, buine cene,
 Biell tratt, bon jett, e buine servitut,
 Cun spese tal, che non mi visi apene,
 Lu dis: de Cros di Malte a la salut.

Jevat in tal doman, m'in lei a messe;
 E cu l'incontro istess ch' a l' è infallibil,
 Cu la me sflachie, in che matine istesse,
 Tresesim rivedei simpri godibil.

E franc entrat in chiasse di me Sur
 Cun je gustai a taule preparade;
 E dopo un poc durmit, batei mo il dur
 Segnant fin a Padiar cui varcs la strade.

Munit d'un ciart cugnat par cheste vie,
 E strac pluitost dal viaz un poc lungott,
 Soi làt a mangià un crust in Ostarie,
 E bevi un scalf in doi del plui bigott.

Passand mio Fradi in sul bruni la sere,
 Dit schiao: branchi d'un colp l'ardit Sturnel,
 E in len montat, batude la carriere,
 A chiasse capitai come un uciell.

Quant foss dolcissim rivedè la Mari,
 Fradis, e Surs, Cugnadiz e Cugnaz,
 Gnezzis, Nevoz, e l'unic mio Copari,
 Paringh, Amis, e i Tutelars Amaz :

Ah! chei lu disin rinomaz viators,
 Naviganz, vagabonz, e Pelligrins,
 Chei Guerirs, chei proscriz, o Disertors,
 Chei Chiargnei remenaz in plui confins.

Superstitis in Arte, deh! scusait,
 La me improvise fughe e solitarie
 Senze i debiz saluz, ed incolpait
 Tetre atmosfere, minacciose, e varie.

Vilane, accidental, fugace scorte,
 Per cui seguì, miei chiars, us lassai soi,
 Mi sparì vie qual lamp; e jo po a sorte,
 Dovei pai boschs sirimi lu ver troi.

Ma ce ocor co mi piardi in complimenz
 Cun personis di Mont ch'an tant viazat,
 Che cognossin a plen ju cas urgenz
 Par compatimi se anchie ves falat?

Jo uè informat del uestri biell ritorno,
 Me la gioldei, in sintì che dug stais ben,
 Mancul doi soi del nestri istess contorno
 Che par puartale fur non val inzen.

Non stait minghe par chest a ve' paure?
 Se anchie mo lor s'inzegnin di muri;
 Cui po quintrì il destin opponi cure,
 Voe, o non voe, bisugne di' di sì.

Ah po fa il Diaul! no sones, ditt, spetacui
 A viodi a plombà là plui muarz che vis,
 Non uei mo che la Font fasi miracui;
 Se nissun mur, non vivin ju Peris.

Ma se non foss la Pudie tant famose,
 No non laress in ronde pes Citaz,
 E tant mancùl saress cussì costose,
 Nè il miedi la daress ai siei malaz.

Eh! domandait us prei, duquang chei Stranis,
 Chei Tèroles, Todescs, e Trièstins,
 Che jerin là cun no' za setemanis,
 Se salut ch'han quistat cun pos flurins?

E po chialaimi me ce buine ciere?
 Cumò jo mangi clauz, jo stoi benon;
 Non hai plui mal di stomi; duar la sere,
 Stitic no soi, ne zem d'opilazion.

Dei Socios Agarù, nanchie discori.
 No ju veso a bricòle sott ju voi?
 Mai viod pur jo par Udin simpri a cori:
 E sans, par Cincinoto, come ròi.

Cumò parbiùs, si cor come Lachess
 Sfidand curirs, Velocis, e Stafetis,
 Non curansi des Bighis e Caless,
 E oltrepassand ju folcs e lis saetis.

Ma quant che l'istess trono si è convint
 Dei gran vantaz che puarté e societât:
 E qual Pari afetuôs, plui pront del vint
 Ristauros imponenz ha decretat:

Ce ocor di chiantà plui la Falulele
 Sore une chiosse in Friul cotant palmar!
 Non uei po minghe fa il Torototele,
 S'anchie no crodis, non m'impuarte un quar.

Inziguirs chiars, al sacro uffizi intenz
 Di preparà ai Bevonz propizie strade,
 Deh! su la But tirait cinch volz potenz
 Par che no sechi plui, co je spanzade.

Regolainus la viuzze Idropotorie,
 E a la Font inalzait un biell Trofèò;
 E su la vaste grave provvisorie,
 Stampainus su un Casin Cafetolèò.

Amis di eur restais dug invidaz
 Par un'eltri an ai liquiz elemenç,
 A rivivi fra chei orrors beaz
 A propr's spesis, senze complimenç.

Se prime di partì mi yisarès,
 Io vegnarai cun vo in compaguie;
 Se no, po larai sol, come che olès;
 Ma di manchià, no manchi pardie.

Cividine di gnuy sarin cun vo:
 Prontait l'apartament; ditt a Jacott;
 Che cui Amis al fasi miei ch'al po,
 Che si contenti di ving sold par gnott.

Sai ch'i coste un tesaur chell biell Local;
 Ma ce zove; cumò l'è chell ch'a l'è;
 Lu disin dug ch'al fas plui ben che mal,
 Nol saveso anchie vo al par di me?

Cussi po no' starin plui dis cun lui,
 E ridi lu farin e sgnangassà,
 E jo contant lis ueris dal Tutui,
 La gote i schiazzarai nel Canada.

Ah! se nol vess chel signoril torment,
 Saress un Rol, un Toro, anzi un Leon;
 Si bearessin di lui ogni moment,
 Come un' Uranie un di cul fresc Adon.

Cumò sin intinduz; adio Amis;
 Chiar sior Bepo patron, che mi stei ben;
 Se a cas no din un sclopp, se sarin vis,
 A ravedesi in Lui chest an che ven.



